

(10) Librum autem Ecclesiasticum conposuit Iesus filius Sirach Hierusolimita, nepos Iesu sacerdotis de quo meminit Zacharias; qui liber apud Latinos propter eloquii similitudinem Salomonis titulo praenotatur. Praeterea Iudith et Tobi siue Machabeorum libros qui auctores scripserunt minime constat. 5

(11) In nouo autem testamento quattuor libros euangelicorum quattuor euangelistae singulos scripserunt; quorum solus Matheus hebreo scripsisse perhibetur eloquio, ceteri greco. Paulus apostolus suas scripsit epistolas; ex quibus nouem septem ecclesiis scripsit, reliquas discipulis suis Timotheo, Tito et Filimoni. 10
Ad Hebreos autem epistola plerisque Latinis eius esse incerta est propter dissonantiam sermonis, eandemque alii Barnaban conscripsisse, alii a Clemente scriptam fuisse suspicantur. (12) Petrus scripsit duas nominis sui epistolas quae catholicae nominantur; quarum secunda a quibusdam eius esse non creditur 15 propter stili sermonisque distantiam. Iacobus suam scripsit epistolam, quae et ipsa a nonnullis eius esse negatur sed sub nomine eius ab alio dictata existimatur. Iohannis epistolas idem Iohannis edidit; quarum tantum prima a quibusdam eius esse asseritur, reliquae duae Iohannis cuiusdam presbiteri existimantur; cuius, 20 iuxta Hieronimi sententiam, alterum sepulchrum apud Ephesum demonstratur. Iudas suam edidit epistolam. Actus Apostolorum Lucas conposuit sicut audivit uel uidit. Apocalypsin Iohannis euangelista scripsit eodem tempore quo ob euangelii praedicationem in insulam Pathmos traditur alligatus. | 25

(13) Hii sunt scriptores sacrorum librorum diuina inspiratione loquentes atque „ad eruditionem“ nostram praecepta caelestia dispensantes. Auctor autem earundem scripturarum spiritus sanctus esse creditur; ipse enim scripsit qui per prophetas 30 suos scribenda dictauit.

Iam tibi, post psalmorum originem atque hymnorum, post sanctorum etiam librorum numerum, postulata sequentia praenotabo.

¹⁵ Vgl. HIERONYMUS, *uir. ill.* 9 (TU 14/1a,13).